

TARIKH : 10 JULAI 2025
AKHBAR : BERITA HARIAN
MUKA : 24
SURAT

Bank negara turunkan OPR kepada 2.75 peratus

Bisnes

Khamis,
10 Julai 2025
bhbiz@nstp.com.my

* Ikuti lebih berita di www.bharian.com.my

Bank Negara turunkan OPR kepada 2.75 peratus

Langkah awal kekalkan laluan pertumbuhan stabil dalam keadaan jangkaan inflasi sederhana

Oleh Alzahrin Alias
zahrin@mediaprima.com.my

Jawatankuasa Dasar Monetari (MPC) Bank Negara Malaysia (BNM) membuat keputusan menurunkan Kadar Dasar Semalaman (OPR) sebanyak 25 mata asas kepada 2.75 peratus.

Seiring dengan itu, kadar siling dan kadar lantai bagi koridor OPR turut dikurangkan masing-masing kepada 3 peratus dan 2.5 peratus.

Ini adalah kali pertama bank pusat menurunkan OPR selepas mengekalkan kadar itu sebanyak 12 kali sejak Mei 2023.

"Petunjuk terkini menunjukkan pertumbuhan global terus berkembang, disokong oleh perbelanjaan pengguna yang berterusan dan pada tahap tertentu, aktiviti yang diawalkan.

"Unjuran pertumbuhan global dijangka terus disokong oleh keadaan pasaran buruh yang positif, dasar monetari yang kurus ke-

tat serta rangsangan fiskal.

"Namun begitu, prospek ini masih dibayangi ketidaktentuan berhubung perkembangan tarif dan ketegangan geopolitik. Ketidaktentuan ini juga boleh membawa kepada peningkatan turun naik dalam pasaran kewangan global dan harga komoditi," katanya dalam satu kenyataan.

BNM berkata, bagi Malaysia, perkembangan terkini menunjukkan pertumbuhan aktiviti ekonomi yang berterusan pada suku kedua, didorong oleh permintaan domestik yang kukuh serta pertumbuhan eksport.

Melangkah ke hadapan, ia berkata pertumbuhan dijangka terus disokong oleh daya tahan permintaan dalam negeri dengan pertumbuhan pekerjaan dan upah, khususnya dalam sektor yang berorientasikan domestik, serta langkah dasar berkaitan pendapatan akan terus menyokong perbelanjaan isi rumah.

Katanya, pengembangan aktiviti pelaburan akan terus didorong oleh kemajuan projek berbilang tahun dalam sektor swasta dan awam, tahap pelaksanaan pelaburan yang diluluskan yang tinggi secara berterusan serta pelaksanaan inisiatif pemangkin di bawah pelan induk nasional yang sedang berjalan.

"Hasil rundingan perdagangan yang menggalakkan, dasar pertumbuhan di ekonomi utama dunia, permintaan berterusan terhadap barangan elektronik

dan elektronik (E&E) serta aktiviti pelancongan yang rancak turut dijangka dapat meningkatkan prospek eksport Malaysia," katanya.

Bank pusat walau bagaimanapun berkata, imbalan risiko terhadap unjuran pertumbuhan masih cenderung ke arah penurunan, terutama disebabkan oleh perdagangan global yang perlahan, sentimen yang lemah, serta pengeluaran komoditi yang lebih rendah daripada jangkaan.

Katanya, kadar inflasi keseluruhan dan teras pula masing-masing mencatat purata 1.4 peratus dan 1.9 peratus dalam lima bulan pertama tahun ini.

Inflasi 2025 kekal sederhana

Menurut BNM lagi, secara keseluruhan, inflasi bagi 2025 dijangka kekal sederhana, disebabkan oleh keadaan kos global yang terkawal dan ketiadaan tekanan permintaan domestik yang berlebihan.

Ia menegaskan bahawa tekanan inflasi daripada harga komoditi global dijangka kekal terhad, sekali gus menyumbang kepada keadaan kos domestik yang sederhana.

"Dalam persekitaran ini, kesan keseluruhan daripada pelaksanaan pembaharuan dasar domestik yang telah diumumkan

dan akan datang terhadap inflasi dijangka dapat dikawal," katanya.

Mengenai prestasi ringgit pula, BNM menjangkakan mata wang tempatan akan terus dipengaruhi terutama oleh faktor luaran.

Prospek ekonomi Malaysia yang positif dan pembaharuan struktur domestik, yang dilengkapi dengan inisiatif berterusan bagi menggalakkan aliran masuk modal, akan terus memberikan sokongan berdaya tahan kepada ringgit, katanya.

"Walaupun ekonomi domestik berada pada landasan yang kukuh, ketidaktentuan yang berte-

rusan dalam perkembangan luaran boleh menjejaskan prospek pertumbuhan Malaysia.

"Oleh itu, pengurangan OPR ini adalah langkah awal yang bersifat berjaga-jaga untuk mengekalkan laluan pertumbuhan yang stabil bagi Malaysia dalam keadaan jangkaan inflasi yang sederhana.

"MPC akan terus berwaspada terhadap perkembangan semasa dan menilai imbalan risiko terhadap unjuran pertumbuhan serta inflasi dalam negara," katanya.

